

弘

簡

錄

弘簡錄卷一百二十五

明刑部員外郎仁和弘齋邵經邦學

皇清翰林院侍講學士四世孫遠平校閱

侍從 宋四之二

石熙載

子中

陳恕

張洎

孫瓌

郭贄

李至

辛仲甫

王沔

弟淮

溫仲舒

錢若水

父文範

劉昌言

李覺

父成

孔維

韓丕

張茂直

王著

呂祐之

潘慎修

石熙載字凝績洛陽人徵時爲親負米嵩陽道中遇一叟熟視曰真人將興子當居輔弼之位言訖不見登顯德進士性疎俊有量居家嚴謹守禮法宋初以殿前都虞候領泰寧軍節度太宗辟掌書記及尹京表爲開封推官改左拾遺補闕外艱起復

以譏出掌忠義崇武二軍書記太平興國初復召同知貢舉時
梅山洞蠻爲寇命知潭州擢兵部員外郎領樞密直學士未幾
簽書樞密院事賜官第一區爲人忠實遇事盡言是非好惡無
所顧避人有善卽推薦之時稱長者上親征河東以給事中充
樞密副使久乃論功遷刑部侍郎拜戶部尚書知樞密事上眷
注甚篤以疾求解加右僕射卒年五十七車駕臨視贈侍中諡
元懿上歎曰熙載事君之心純正無他方當委用而奄忽至此
大可惜也咸平二年配饗太宗廟庭平居以孝友聞事繼母牛
氏得其歡心母前夫子熙導恩補殿直從弟熙古幼弟熙正皆
第進士至供備庫副使撫之如一人無間言養子中孚至虞部
員外郎子中立字表臣十三而孤性疎曠好諸謔補西頭供
奉官改光祿寺丞家財悉推與諸父已無所受擢直集賢院與

李宗諤楊億劉筠陳越相善校讐秘書凡更其手人皆傳之判
三司理欠憑由帝幸亳命修所過國經爲鹽鐵判官改判吏部
南曹戶部勾院注釋御集爲檢閱官遷戶部郎中史館修撰糾
察在京刑獄知制誥領審官院同知貢舉坐舉官不當落職頃
之復官領三班院歷右諫議大夫給事中入爲翰林學士判秘
閣與張觀兼行外制遷禮部侍郎學士承旨兼龍圖閣學士景
祐四年叅知政事諫官韓琦言其喜譔笑非大臣體寶元初罷
爲資政殿學士領通進銀臺司判尚書都省進大學士遷吏部
侍郎提舉祥源觀加太子少傅致仕卒贈太子太傅諡文定平
生練習臺閣故事不汲汲近名喜賓客家產歲入不足以供臨
終喪不能辦帝聞賜白金三百孫行簡祥符進士居簡太子中
允集賢校理

陳恕字仲言南昌人素性强明少爲縣吏折節讀書江南平知
洪州王明召見與語大奇之因資送令預計偕登進士解褐大
理評事通判澧州澧自唐季以來簿書乾沒吏緣爲姦恕至盡
摘發其弊入累贊善大夫左拾遺判三司勾院充度支判官與
判使王仁贍廷爭司事仁贍屈伏擢本司員外郎遷工部郎中
知大名時莽丹內寇詔增浚城隍器用不時集恕檄郡中大豪
一人會將吏將斬之宗族號救豪叩頭流血請翼日集事恕令
械以徇民皆懼數日功就召爲三司副使遷右諫議大夫知瀛
州時議河北營田恕奏制各不同古者兵出於民故可以無寇
則耕寇至則戰今士皆以募致衣食仰給縣官若使之冬持兵
春執耒未必不怨萬一生變悔無及矣議遂寢俄知代州入判
吏部選事拜鹽鐵使恕有心計胥吏懾服釐去宿弊號能稱職

太宗深器重之。親題殿柱曰：真鹽鐵。陳恕遷給事中，叅知政事。數月，坐與樊知古漏泄禁中語，罷知江陵大發軍，吏姦賊坐罪。停廢者衆，郡內惕息。復以爲鹽鐵使。太宗留意金穀，召三司李溥等二十七人，對於崇政殿，詢以計司利害。溥等條上七十一事，詔以四十四事付有司行之。上又言：國家賦入數倍於唐，唐季藩鎮擅命，征賦多不入公家。下陵上替，經制廢壞已久。因召恕等責以職事。曠廢對曰：今土宇至廣，庶務至繁，國用軍需所資，浩瀚凡遇災沴，盡蠲諸州租稅。臣等每舉利權，輒慮侵民，尼而不行。縱使耿壽昌、桑弘羊復生，亦所不迫。况又駑劣，惟盡心簿領，終不足上裨聖治。上曰：卿等清而不通，專守繩墨，終不能爲國度長挈大。剖煩析滯，如京城倉庫主吏當改職者，簿領中一處節目未備，卽至十年五年不決，以致貧無資給，轉徙溝壑。

此卿等之過豈不反傷和氣哉皆頓首謝至道二年欲併三司
命官總判令恕條列七司事以聞恕奏勾院磨勘兩司出於舊
制關防之要莫切於此理欠憑由雖非舊設自理欠失序憑由
散落故設二司專令典掌以究其弊綱目咸具制置有倫實亦
要切不可廢除其主轄支收司先因從京轉輸外地此除彼附
照驗稽滯若於京城專行檢轄亦爲允當其行帳司近日權置
帳目告盡司額自除提點司是中旨特置提振三司廢怠之事
固非有司所敢擬除凡此皆因三司簿牒填委若三部各設主
事辦事亦易詔皆從其請會將立茶法召茶商各條利害恕與
副使宋太初共閱之第爲三等言下等滅裂無取上等取利太
深此可行於商賈不可行於朝廷惟中等公私皆濟吾裁損之
可以經久乃始爲三法行之貨財流通峽路諸州承孟氏之舊

賦稅輕重不均。運副張曄年少氣銳。受詔按覆。卽便宜革之。計一州歲虧上供絹萬餘。曄奏。曄專擅削任。停免每便殿奏事。太宗或未深察。必形誚讓。曄歛板蹙鼻立殿壁。若無所容。稍俟意解。復執前奏。終不改易。或至三四上。始俞允。歷禮戶二部侍郎。咸平二年。真宗北巡。充行在轉運使。曄事母至孝。以母老求解。改吏部侍郎。知通進銀臺。封駁司。曄言。封駁之任。實給事中。之職。隸於左曹。今雖別建官局。不可失其故號。請以門下封駁事。隸銀臺司。詔可。五年。知貢舉。以王曾居首。時議稱之。母亡哀毀。羸瘠起復視事。遷尚書左丞。權知開封。羸疾益甚。上詔太醫診療數月。表求館殿職事。上命求可代者。乃薦寇準。收集賢學士判院事。準檢尋。曄前後改革興立之事。類以爲冊。別用新板刊所出。舊榜躬至。恕私第請判。曄亦不讓。自是無不循其舊。

貫至李諸領使始改茶法恕之規模漸革矣卒年五十九口占遺奏及約束後事送終之具無不周悉上深悼惜廢朝贈吏部尚書平生頗涉史傳多識典故善於談論聽者忘倦然深刻少恩人不敢干以私素拒釋氏嘗請廢譯經院真宗曰三教之興其來已久但存而不論可也子執中宰相執古虞部員外郎執方執禮並太子中舍

張洎字師黯一字偕仁全椒人世事南唐曾祖昉澄城尉祖蘊泗上轉運巡官父煦滁州司法掾洎少有俊才博通經史登進士調上元尉召爲記室擢工部員外郎清輝殿學士叅預機密不離左右中外之務一以諮之爲建大第賜書萬卷賚予甚厚王師圍城勸李煜勿降因爲煜草詔以蠟丸召上江救兵旣而城陷洎給光政使陳喬同死喬自經洎獨歸本朝太祖切責出

前詔示之洎頓首請死辭氣慷慨上奇之貸其死除太子中允
歲餘判刑部太宗多其文雅熟知典故遷直舍人院考試諸州
進士未幾使高麗改戶部員外郎出知相州徙貝州不長吏治
上以洎儒生不之責也令知譯經院遷禮部郎中雍熙二年同
知貢舉端拱初判考功會覆錢俶諡狀內有受寵若驚居亢無
悔語郎中張泌駁之謂俶乃藩臣名不可稱龍位不可爲亢請
改正洎以狀對壘壘援引故實皆有依據詔不問未幾遷太僕
少卿同知京朝官考課兼史館修撰判集賢院淳化中同楊徽
之等修正入閣舊圖洎討論故事獨草奏上之又言今起居日
侍從官入殿庭東西立俟正班入東西列拜同時起居甚失北
面朝謁之儀請準舊儀侍從官先入起居畢分立於丹墀之下
謂之蛾眉班然後宰相率正班入起居雅合於禮詔從之又疏

言陛下自臨大寶十有五年未嘗一日不雞鳴而起雖剛健不
息天德之常然而游焉息焉亦聖人之謨訓望華唐初故事五
日一朝或分雙日與隻日不報久之擢中書舍人充翰林學士
與錢若水甚被寵顧俄判吏部銓嘗引對選人上顧謂近臣曰
洎富有文藝至今尚苦學江東士人之冠楊徽之錢熙謂洎旦
夕當大用以語劉昌言洎轉白於上上怒召昌言質問黜微之
等官時皇子益王元傑改封吳王行揚潤二州大都督府長史
領淮南鎮江兩軍節度使洎因上議曰謹按前史皇子封王以
郡爲國置傅相及內史中尉等佐王爲治自漢魏以降所封王
不之國惟命卿大夫臨郡卽稱內史行郡事若東晉瑯琊會稽
臨川三王卽用謝靈運王羲之等爲會稽臨川內史是也唐以
楊益潞幽荊五郡爲大都督之號非親王不授或親王遙領朝

命大臣臨郡。卽加長史副大使知節度事。如段文昌李載義爲淮南盧龍二軍節度副大使兼大都督府長史是也。今益王以揚潤二郡建社爲吳國王。居大都督之任。又正領節度事。若再加長史之號。乃是國王自爲上佐。設若但以長史拜受。其加銜內。又無副大使知節度事之目。倘或他日別命守將。俾臨本郡。卽不知以何名目授除。乞付中書改正。宰相以制命已行。令候明年郊祀單慶。遂改正焉。上重其該洽。嘗賜詩褒美。有翰長老儒臣之句。洎與叅政蘇易簡不協。多攻其失。易簡罷。卽以洎爲給事中。叅知政事。與寇準同列。初準於上前每言洎可任。旣同叅政。奉準愈謹。政事一決於準。無所叅預。專修時政。記甘言善柔而已。後因奏事異同。準復忌之。至道二年。曹璨自河西馳奏。繼遷寇靈州。上詔宰執各盡所見。畫策具奏。洎揣摩上意。疏請

棄靈武以省餽運帝覽奏不悅以疏還之洎恐懼欲自固權位因奏事大言準退後多誹謗準不敢辯上怒罷準未幾洎以病在告改刑部侍郎罷知政事疾遂亟卒年六十四贈刑部尚書洎美風儀文采清麗言辭捷給善持論兼通道釋書然性儉詖好攻人短在江南時毀殺潘佑與張泌議事不協遂相讐與潘慎修徐鉉善後至絕交李煜旣歸朝貧甚洎猶丐索無厭煜以金類面器與之煜子仲寓死洎亦不弔性鄙吝親故罕登其門惟善事內官嘗奏內供奉藍敏政爲學士內侍唐愈副之上曰此唐室弊政安可踵此洎慙而退有文集三十卷子安期國子博士方回虞部員外郎孫環字唐公王欽若圻及第除秘閣校理同知太常禮院改諡錢惟演諡文墨曰思請殺溫成廟享禮俄判吏部南曹爲開封推官歷知洪州兩浙運使加直史館

知穎揚二州就拜淮南轉運入修起居注知制誥坐草故相劉
沆贈官制言其附會取顯位其子瑾訴環挾私怨出知黃州還
判流內銓英宗時論先朝乞密定儲副者進左諫議大夫侍讀
學士瑾又訟環前調其子不應法復出知濠州歷應天河南河
陽當官遇事觸忤勢要至屢黜不悔卒年七十 環初名琥字

遂明早孤鞠於兄環登第歷鳳翔法曹緡雲令與王安石善除
集賢校理編修中書條例俄知諫院又直舍人院令草詔貴楊
繪劉摯論助役法環固辭改命會布爲之由是忤安石意改同
修起居注坐奏事不實解三職已而復之時議建武學環言古
者舞干習射受成獻功皆在太學人才咸自此出未聞偏習其
一請無問文武之士悉養於太學又欲復河隴因勢遂定夔蜀
荆廣諸夷環言先王務治中國而已今生財未盡有道用財未

盡有禮不宜遽及徂征之事。皆不聽。俄以集賢殿修撰知蔡州。條具廬秉鹽法峻急。一人抵禁。數家黥徙。朝廷自行役法。最下戶亦每歲納錢乞度。寬羨數均損之。以惠貧弱。復知諫院。兼侍御史。知雜事。蘇軾鄭俠獄起。璩與李定雜治。欲傳致之死。又劾馮京與俠交通罪。之改判司農寺。出知河陽。元豐初入權度支。副使知制誥判國子監薦蔡卞爲直講。議增博士弟子員。月書季考畧倣周官鄉比之法。立齋舍八十二。又詳定郊廟禮文。奏國朝未嘗躬行方澤之禮。請於夏至日備禮容樂舞以象宰攝事。卒行其說。進爲翰林學士。詳定官制。以寄祿二十四階。易省寺虛名職名。始正拜叅知政事。改中書侍郎。璩素性姦邪。便佞善窺主意。隨勢所至而依附之。往往以危機陷人。汲交舒直。數起大獄。初奉安石旋附惠卿。隨王珪黨章惇。諂蔡確。數人之性。

不同而能援情變節。左右從順各得其歡心。元祐初劉摯論罷以資政殿學士知鄭州徙河南定州大名進大學士知揚州卒贈右銀青光祿大夫諡簡翼

郭贇字仲儀開封襄邑人登進士太宗尹京時素聞其名太平興國初擢著作佐郎右贊善大夫兼皇子侍講賜緋魚上幸東宮出戒子篇命注解且令講說以喻諸王三年同知貢舉遷右補闕拜中書舍人賜金紫五年復典貢部會初置京朝官差遣院凡將命出入受代歸闕悉考校勞績銓量才品卽命掌之遂拜叅知政事任遇不次每論奏誓以直報嘗白弭德超誣曹彬趙普重之無何入對因宿醒左遷秘書少監知荆南遇天旱俗尚浮祀盛陳禱雨之具命悉撤投之江不數日大雨就加左諫議大夫入爲鹽鐵使奏除諸路積逋正犯繫死于孫猶禁者多

所獨貸籍田超拜工部侍郎淳化中知澶州河決坐免久之復起爲給事中知審官院通進銀臺封駁司真宗時拜刑部侍郎知天雄軍召入歷判太常寺吏部流內銓集賢院學士判院事知河南府獻詩自陳復改吏部侍郎俄兼秘書監上以先授經嘗至其家每稱贊純厚長者在秘府屢賜對詢訪舊事愍其老特拜工部尚書侍讀學士作詩賜之有啓發冲年曉典常語東封改禮部尚書集晉邸時凡屬和御製篇詠釐爲四卷以獻優詔嘉獎卒年七十六上以舊故特臨哭之贈左僕射謚文懿錄其子昭度大理寺丞昭升昭用並大理評事昭允左贊善大夫平生屬文敏速而不雕刻有文懿集三十卷性溫和頗能延譽時雋薦引宋白同掌誥命器趙昌言於爲兒時擢居奏名之首有同邑子忌贊聲名潛加構毀贊聞之轉薦其子其人愧泣而

去然性吝嗇切於治生晚節不事事人頗少之

李至字言幾真定人生時母張氏夢八仙人自天降授以字圖使吞之誕後七歲而孤鞠於飛龍使李知審家及長沉靜好學善屬文辭華典瞻登進士釋褐將作監丞通判鄂州擢著作郎直史館征太原命督澤潞芻糧還遷右補闕知制誥太平興國中轉比部郎中翰林學士右諫議大夫叅知政事雍熙初拜給事中時議親征范陽至疏言用兵之道必務萬全幽州爲敵右臂王師所向彼必拒張攻城數萬兵食倍之金湯之堅必資機石范陽傍無陵阜去山旣遠取石尤難儻有未備願且畜威養銳觀釁伐謀若聖心獨斷在於必行則京師天下之本陛下恭守宗廟命將出師不離京國策之上也大名河朔咽喉暫駐鑾輿揚聲自將以壯軍威策之中也若遠提師旅親抵邊疆北有

契丹之虞南有中原之慮臣雖不肖願効曳裾斷鞅之忠不聽以目疾求罷授禮部侍郎會初建秘閣與李昉王化基等選三館書置閣俾至總之每觀書閣中上必遣使賜宴三館學士皆與至請昇秘閣次於三館上嘗幸之賜御書草字千文至謂千文乃梁武得破碑鍾繇書命周興嗣次韻而成理無足取莫若孝經有資教化仍御書以賜至薦潘慎修舒雅杜鎬吳淑等入充直閣校理請益購亡書閒以新書奏御必賜坐延見恩禮甚厚淳化五年兼判國子監至上言五經書疏俱已板行惟二傳二禮孝經論語爾雅七疏未備望令重加讐校以備刊刻從之又命淑雅鎬檢正譌謬至與李沆領總裁真宗昇儲兼太子賓客詔以師禮事之卽位拜工部尚書仍叅政事帝訪以靈武事對曰河湟之地先王置之度外繼遷異類騷動罪固難贖但聖

人之道務屈已含垢以安億兆蓋所損者少所益者大望陛下
以元元爲念不以小醜介意苟啖以厚利靡以重爵亦安肯迷
而不復哉昨鄭文寶絕青鹽使不入漢界禁粒食使不及羌獍
致彼有詞今若復禁止恐非致敵懷遠不戰屈人之意後靈武
卒不能守有疾求解政授武勝軍節度使知河南詔甫下卒年
五十五贈侍中子惟良惟允惟熙皆給俸終制至剛嚴簡重人
士罕登其門嘗師徐鉉手寫鉉文及其弟錯集又爲鉉與李昉
石熙載王祐李穆作五君詠性吝嗇遂知審養子而利其資人
以是譏之

辛仲甫字之翰汾州孝義人曾祖實石州推官祖迪壽陽令父
藩河東節度判官仲甫少好學及長偉姿儀器局沉厚兼長吏
事周廣順中郭崇領武定節制署掌書記從鎮澶淵太祖受命

監軍陳思誨密奏崇有姦狀上怒且疑遣中使馳往驗之崇憂
懣失據謂賓佐曰苟王人不察爲之奈何仲甫進曰皇帝膺運
公首効節軍民處置率循常度何以加辭第遠偵使者率僚屬
盡禮郊迎聽彼伺察久當自辨崇如其言使者至視崇果無他
意還奏上大喜歸罪思誨乾德五年召入拜右補闕出知光州
有橫河與城直會霖潦水暴疾潰廬舍仲甫集船數百軍資民
備皆賴以濟移知彭州州卒誘營兵及諸屯戍謀以長春節宴
集爲亂適仲甫出城巡視見濠中草深意可藏伏命燒薙之兇
黨疑謀泄自首禽斬百餘人禍不作州界少種樹暑無所休仲
甫課民栽柳廢行路彭人德之名爲補闕柳太祖問趙普文武
兼資者普舉其名以對徙益州兵馬都監代還改三司戶部判
官太平興國初遷起居舍人奉使契丹遼主問黨進何如人對

曰國家名將輩出如進鷹犬材耳何足道哉。遠主欲留之辭曰。信以成命義不可留。有死而已。竟不能屈。使還以刑部郎中出。知成都。既至政尚寬簡。奏免歲輸銅錢罷榷酤。蜀人安之。八年加右諫議大夫。時彭州盜賊連結爲害。詔捕未獲。仲甫誘令自縛。詣吏者百餘人。餘驚逸去。九年入知開封。拜御史中丞。雍熙二年轉給事中。叅知政事。時呂蒙正居首相。王沔任事。仲甫從容其間。端拱中進戶部侍郎。淳化二年足疾罷爲工部尚書。出知陳州。真宗加太子少傅。卒年七十四。贈太子太保。子若冲若虛若蒙若濟若渝皆能其官。孫有孚有鄰中進士。

王沔字楚望。濟州人。登太平興國進士。解褐大理評事。親征太原。名見行在。授著作郎。直史館。遷右拾遺。出爲京西運副。改右補闕。知懷州。八年同知貢舉。擢膳部郎中。樞密直學士。遷右諫

議大夫簽書樞密院事賜第崇德坊雍熙元年授左諫議大夫
樞密副使端拱初改戶部侍郎叅知政事淳化初趙普罷呂蒙
正寬簡自任政事多決於沔同列張齊賢陳恕頗不悅踰年二
人皆叅政沔不自安慮僚屬有以舊事告齊賢等會王禹偁言
兩府不得於本廳見客許於都堂延接沔喜卽奏行之謝泌疏
駁以爲不可追還前詔沔坐罷守本官見上涕泣不願離左右
未幾髭鬢皆白有毀沔者上謂沔甚明敏毀者慚而止沔求欲
再用因命同知京朝官考課立法背察上言京朝官有犯令刑
部條報分賊及公私罪三等以聞受命甫旬日以暴疾卒年四
十三贈工部尚書沔聰察辯給有適時之用上前言事能委曲
敷繹每廷試讀進士辭賦音吐明暢經讀者多中高第然性苛
刻少誠信凡登見者必啗以甘言皆喜過望旣而進退非允人

胥怨之。弟淮任殿中丞。嘗掌香藥。權易院坐。賊論當棄市。以
沔故詔杖。謫定遠主簿。沔亦以是屢爲寇準所詆云。

溫仲舒字乘陽。河南人。太平興國初。登第。釋褐大理評事。通判
吉州。遷秘書丞。知汾州。坐事除名。未幾起爲右贊善大夫。通判
睦州。端拱初。拜右正言直史館。判戶部。憑由司。三年。拜工部郎
中。樞密直學士。知三班院。彗星見。召對言。國家自平太原。燕代
之交。城守年深。殺傷剽掠。彼此迭見。大河以北。農桑廢業。戶口
減耗。凋敝之餘。極力奉邊。丁壯備徭。老弱供賦。遺廬壞堵。不亡
卽死。邪人媚上。猶云樂輸。加以兵卒荐更。行者辛苦。居者怨曠。
願推恩宥。以綏民庶。上嘉納之。遂赦河北。淳化二年。拜右諫議
大夫。樞密副使。同知樞密院事。四年。罷。知秦州。羌戎有西馬家
梁。藏梟波等。部唐末以來。占據渭河之南。大洛門砦。多產良木。

歲調卒採伐給京師必以貨假道猶不免攘奪殺掠民以爲患仲舒至卽部兵歷按諸砦諭以威信皆願獻地內屬旣而悉徙其部落於渭北立砦以限民感其惠爲畫像祀之有言其生事者詔改知鳳翔連知興元江陵加給事中會內侍藍繼宗使秦州還言其得二砦地甚利乃召拜戶部侍郎尋叅知政事成平初拜禮部尚書罷政知河陽轉開封五年以京府務劇求罷改兼御史中丞尋轉刑部尚書知天雄軍徙河南俄復知審官院祥符中進戶部尚書判昭文館大學士卒年六十七贈左僕射謚恭肅仲舒敏於應務自爲正言至樞密皆與寇準同進時稱溫寇少與呂蒙正同年相契仲舒廢黜累年蒙正極力援引及被任用反攻蒙正士論薄之子嗣良嗣先嗣立並錄以官錢若水字澹成河南新安人父文敏辟劉銖幕府歷長水鄆都

尉扶風令相州錄事叅軍節帥韓重斌取庫錢物不從太祖嘉
其有守授右贊善大夫知瀘州召見諭曰瀘州荒遠尤宜綏撫
聞知州郭思齊監軍郭重選陪歛不法爾至爲朕鞠之苟一毫
侵民朕必不赦後治郡有聲甌人詣闕借留改殿中丞許再任
三遷司封員外郎歷洛州建昌軍卒年七十二若水幼聰悟十
歲能屬文陳搏見之曰子神清可以學道不然當大貴但忌太
速爾登進士調同州觀察推官聽決明允郡治賴之淳化初寇
準薦試翰林擢秘書丞直史館遷右正言知制誥新置理檢院
於乾元門外命領之俄同知貢舉加屯田員外郎詔詣原鹽等
州制置邊事還奏合旨改職方員外郎四年夏五月入翰林爲
學士帝謂侍臣學士之職清要貴重非他官比朕常恨不得爲
之又曰士學古入官遭時得位紆朱拖紫足以爲榮豈不思竭

誠以報國乎。若水對曰：高尚之士，不以名位爲光榮；忠正之士，不以窮達易志操。其或以祿位之故，效忠於上，中人以下之所爲也。帝然之。俄知審官院通進封駁司管草趙保忠，詔有云：「不斬繼遷，開狡兔之三穴，潛歸光嗣，持首鼠之兩端。」太宗大以爲當。至道初，以右諫議大夫同知樞密院事真宗加工部侍郎。母老，堅求解政，充集賢院學士，預修太宗并重修太祖實錄。宗正卿趙安仁言：「夔王於太宗屬當爲兄，實錄所紀繆誤。」若水援國初詔，令廷諍數四，乃定。俄判吏部流內銓，從幸大名，陳禦敵安邊之策。言孫武著書以伐謀爲主，漢高將將以用法爲先，伐謀者以將帥能料敵制勝也，用法者以朝廷能賞罰不私也。近代周世宗亦因斬樊愛能，然後兵威大振，請用軍法。斬傅潛等，以徇。然後擢如楊延朗、楊嗣者，增其爵秩，分授兵柄，使將大兵分

路討除執敢不用命哉。俄知開封復陳備邊五要。一曰擇郡守。二曰募鄉兵。三曰積芻粟。四曰革將帥。五曰明賞罰。又言邊部用兵惟視太白與月爲進退。誠以太白者將軍也。星辰者廷尉也。合則有戰。不合則無戰。合於東則主勝。合於西則客勝。未幾出知天雄軍。兼兵馬部署。朝議請城綏州。詔若水往視之。還言不利。遂罷役。若水率衆過河。分布軍伍。咸有節制。深爲戍將推服。上稱之曰。儒臣中知兵者莫能若也。又遣巡撫陝西緣邊諸郡。并州事六年。有疾。自知不永。懇求避位。歸京師。卒。年四十四。贈戶部尚書。若水美風神。有器識。能斷大事。雅善談論。事繼母以孝聞。輕財好施。推誠待物。所至委任僚佐。總其綱領。無不稱治。喜汲引後進。推賢重士。黻度豁如。故人尤惜之。有集二十卷。兄若愚。比部員外郎。若冲。河陽令。調孟州別駕。子延年。甫七歲。

錄奉禮郎後獻文賜進士出身歷太常博士集賢校理

劉昌言字禹謨泉州南安人少篤學文詞靡麗節度陳洪進辟爲功曹叅軍令掌牋奏偕洪進子文顯入貢太祖厚勞之洪進歸朝太宗命鎮徐州昌言從爲推官應舉入格授歸德軍掌書記擢第遷保信武信二鎮判官素有吏幹趙普重之錢淑帥鄆復薦爲泰寧節制判官改左司諫廣南安撫使淳化初普留守西京表爲通判委以府政普卒經理其家帝以忠於所舉拜起居郎賜金紫并錢五十萬連封三日皆至日盱昌言捷給詠詭能揣人主意無不稱旨遂不次登用遷工部郎中踰月充樞密直學士同知審官院驟遷右諫議大夫同知樞密院事不爲時望所伏貌又非偉且多閩語或有短之者上曰以貌取人失之子羽朕聞其語獨能曉之又短其委母妻鄉里十餘年別娶旁

妻詔迎歸京師州縣給裝續食因諭文武官但有父母在劔南
陝路嶺南者皆令迎侍違者糾舉三司吏趙贊以能詞外事上
頗任用遷供奉官右侍禁閣門祇候至副使與昌言善嘗保任
之贊所爲橫恣不法被誅昌言心不自安因上言及侍臣有與
贊交者昌言遽出位頓首稱死罪上慰勉之然由此惡其儉詐
罷爲給事中山知襄州爲政不循舊章歛怨於民詔責之至道
二年徙知荆南真宗時拜工部侍郎卒年五十八贈工部尚書
子有方比部有正虞部皆員外郎中

李覺字仲明本長安人曾祖鼎唐末國子祭酒爲蘇州刺史避
亂徙家益都祖瑜青州推官父成字成熙五代末以琴詩遊公
卿間善寫山水烟景萬狀至得意處疑非筆墨所成世傳以爲
寶覺太平興國中舉九經起家將作監丞通判建州秩滿州人

借留就遷左贊善大夫知泗州轉秘書丞與孔維等校孔頴達
五經正義刊板遷禮記博士賜緋魚雍熙三年使交州黎桓誇
示山川之險覺對曰國家提封萬里列郡四百地有平易亦有
險固似此一方何足云哉桓默然色沮端拱元年上幸國子覺
首預學官講說上顧講坐令對御覺辭曰六龍在御微臣何敢
乃詔有司張帟幕別設坐從臣皆列坐聽覺講周易泰卦因述
天地感通君臣相應之旨上悅特賜帛百疋又倣韓愈作竹頌
傳以獻上嘉其文采遷直史館淳化二年又詳校春秋正義成
改水部司門二員外郎判國子監卒爲人性強毅聰敏上書言
時務養馬漕運屯田三事其說詳備令送史館語列本志子宥
字仲嚴幼孤不好弄長讀書屬文不雜交遊祥符中登第調火
山軍判官入館校勘書籍遷集賢校理知蘄州歲凶令收取遺

移計口給穀俾營婦均養之所活甚衆就提點荆湖刑獄有殺人賄傭就獄者宥廉得其情悉論如法擢權戶部判官判戶部勾院知制誥同判太常寺舊制宗廟五饗皆輔臣攝事中廢且久止差從官宥因對力言遂復故事又爲利州轉運使糾察在京刑獄以諫議大夫知江寧民有告人殺其子者以所服巾爲証民自誣服宥疑召問卒伸其枉俄分司南京改太子賓客判留司御史臺卒宥性清介與物無忤好獎拔人士外族貧者分別業畀之旣死家無餘財官賜錢十萬

孔維字爲則開封雍丘人九經及第解褐東明鄆陵二縣簿太宗尹京爲屬邑吏早以經術受知開寶中禮部奏爲考試官舊制舉九經一不第卽改科維論其事非便詔禮部自今同諸科止舉尋調滁州軍事推官太宗卽位擢左贊善大夫知河南除

滑梓二州通判太平興國中拜周易禮記博士七年使高麗耻
衣緋因泣下上憐之賜金紫王治問禮對以君臣父子之道升
降等威之事治悅稱之九年判國子事雍熙初遷主客員外郎
求爲司業卽以授之會上將耕籍田命考制度起自周禮至於
唐書凡沿革事由並錄以獻遂拜祭酒又奏前朝田敏任祭酒
兼領侍郎上亦從之淳化初兼工部侍郎耨紳多謂其躁請無
退讓風受詔校刊五經疏義未畢被病上遣太醫診視使者撫
問掌事黃門言其私用印書錢維憂懼甚上特赦不問將終召
其徒鄭革口授遺表卒年六十四景德四年錄其孫禹圭同學
究出身

韓丕字太簡華州鄭人父杲晉開運中爲曲陽簿契丹攻城沒
焉丕幼孤勵志讀書驪山嵩陽間通周易禮記爲人講說常有

山林之志家貧屢空處之晏如年長始學文開寶中鄭牧知文
州與之偕行薄遊西州劉熙古延置門下令掌書奏妻以孫女
太平興國三年舉進士聲名籍甚公卿多薦之者嘗著孟母碑
返魯頌人多諷誦解褐大理評事通判衡州石熙載薦其文行
代還試中書擢著作郎直史館賜緋魚改左拾遺職方員外郎
知制誥雍熙初加虞部郎中二年同知貢舉丕屬思艱澁典書
命傷於稽緩表求外郡得知虢州就改職方郎中端拱初拜右
諫議大夫賜金紫知河陽濠州本起寒素冲澹自處不奔競名
宦太宗嘉重之淳化二年召爲翰林學士以遲鈍不敏於用罷
充集賢殿修撰累遷給事中工禮二部侍郎史館修撰知均金
滁三州卒爲人純厚畏慎似不能言歷典州郡雖不優於吏事
能以清介自持時稱長者

張茂直字林宗兗州瑕丘人父延昇以經術教授鄉里茂直方弱冠慕容彥超據州城驅之守陴及周師破城將斬之會得釋後勵志於學開寶初州將器其爲人首薦之給錢五萬助裝二年登進士解褐海州推官進司農丞通判泰州爲運使韋務昇誣奏徙監梓州富國監自陳得雪復通判靜安軍軍不領縣城闔之外卽溪州之下博茂直奏割下博諫之進著作佐郎扈蒙薦其才改秘書丞李志又稱其端實命爲益王元傑府記室王好學徵爲詩什援筆而就甚稱賞之待遇甚厚雖受時果之賜亦分餉焉端拱元年召對賜金紫改度支員外三遷本曹郎中眞宗居藩茂直與朱昂並在諸王府每預宴集酬唱因議其名卽位遂與昂相繼知制誥會益王生日遣持禮幣爲賜復至舊府時人榮之爲人淳至寡言晚年多疾才思梗澀不稱改秘書

少監出知潁州卒年七十五子成烈端拱二年及第成務比部員外郎

王著字知微唐相方慶後世家渭南祖賁從禧宗入蜀仕王建爲雅州刺史占籍成都父景瓌萬州別駕著由明經及第歷平泉百丈永康三縣簿蜀平赴闕復主陸平簿素攻書筆跡道如頗有家法太宗留意字書欲令學士刪定訛舛少通習者運使侯涉薦著改衛尉寺丞史館祇候委以詳定篇韻又令徧覽諸家字體益精八法召見賜緋加著作佐郎翰林侍書兼侍讀更直御書院上每聽政之暇令中使王仁睿持御札示著對曰未盡善也上臨學益勤又以示著答如前仁睿詰其故著曰帝王之意或驟稱善則不復留心久之然後曰功已至矣非臣所能及真宗嘗對宰相語其事且曰王著善規益於傳書待詔中求

之未見其比。雍熙二年遷左拾遺使高麗端拱初加殿中侍御史賜金紫卒加贈賜錄其子嗣復爲奉禮郎

呂祐之字元吉濟州鉅野人本州錄事叅軍文贊之子登太平興國進士解褐大理評事通判洋州改右贊善大夫歷泰寧天雄二軍節度判官召拜殿中侍御史決獄西蜀還知衢州換右補闕直史館同判吏部南曹遷起居舍人端拱中副呂端使高麗還獻海外單皇澤詩十九首太宗嘉之淳化初判戶部勾院會分備三館職祐之與趙昂安德裕並直昭文館俄知制誥賜金紫同知貢舉坐薦舉妻族東野日宣鞠獄陳州不實降殿中丞未幾復官至道初拜右諫議大夫賜金紫知審官院真宗轉給事中歷知襄壽昇三州掌吏部選知通進銀臺司拜工部侍郎翰林侍讀學士祐之純謹長者不喜趨競所至無顯赫聲舉

備顧問不能有所啓發改集賢院學士遷刑部侍郎卒年六十
一有集三十卷

潘慎修字成德莆田人父承祐初仕閩後仕李景至刑部尚書
致仕慎修以廕爲秘書正字累遷水部郎中兼起居舍人隨李
煜弟從鎰入貢且求緩兵會捷書屢至邸吏促入賀慎修謂國
且亡當待罪何賀也時皆稱其得體歸朝授右贊善大夫仍爲
煜掌記室煜卒後改太常博士歷膳倉二部員外郎又遷考功
員外郎通判壽州知開封縣又知湖梓二州淳化中李至薦直
祕閣太宗聞其善奕屢召對慎修作碁說以獻因寓規諷太宗
覽而稱善俄直昭文館累遷倉部考功二郎中咸平中副邢昺
巡撫兩浙俄同修起居注景德初衰老求外任真宗稱其溫雅
不忘舊主得臣子之操宜留祕府聽解記注數月擢右諫議大

夫翰林侍讀學士從幸澶州遘寒疾卒年六十九錄其子汝士
大理評事汝礪奉禮郎爲人風度醞籍博涉文史多讀道書善
清談當時士大夫咸推其素尚然頗恃前倖特後進倨慢人以
此少之有集五卷汝士至工部員外郎直集賢院

弘簡錄卷一百二十六

明刑部員外郎仁和弘齋邵邦學

皇清翰林院侍講學士四世孫黃一校閱

侍從 宋四之三

張詠

楊礪

張去華

父誼子師
德孫景憲

樂黃目

父史

柴成務

夏侯嘯

宋湜

趙安仁

父孚子尚寬
良孫君男

查道

從兄

任中正

弟中

朱台符

謝絳

父清

張詠字復之濮州鄆城人少學擊劍慷慨任氣不拘小節好大言家貧客遊未始下人陳搏厚遇之語曰此人於名利澹然無情達必為公卿不達亦為帝王師登進士乙科除大理評事知崇陽勸民拔茶植桑後權茶法行崇陽民獨安其利蘇易簡薦為太子中允歷著作佐郎秘書丞通判麟相二州乞便養掌濮

州市征召還賜緋魚知義儀縣李沆宋湜寇準薦其才以爲
荆湖北路轉運使奏罷歸峽二州水遽夫就轉太常博士太宗
聞其強幹超拜虞部郎中賜金紫擢樞密直學士同知通進銀
臺封駁司兼掌三班院并代部署張永德等犯法小校至死有
詔案之詠言邊任重大若因一校推辱主帥恐小人有輕上之
心不報未幾果有營兵脇制大校者詠引前事爲言上改容勞
之時兩川旱饑選知益州初至值討李順屯兵無半月之食而
鹽索高價詠聽以米易鹽民爭趨之未踰月得米數十萬斛王
繼恩上官正擁兵玩寇不進部下復剽民財詠不欲失歡以言
激正勉其親行仍盛爲供帳餞之正奮行深入以捷聞久之城
中軍食足支二歲遂奏罷陝西糧運上喜曰詠何事不了朕無
慮矣始順黨皆良民多脇從詠諭以恩信使歸田里且曰前日

順脇民爲賊吾今化賊爲民不亦可乎益州不貢士幾二十年
學校頽廢詠訪郡人張及李旼張達皆有學行敦勉就舉三人
悉登科自此士人知勸益務向學民有謀訴者詠灼見情僞立
爲剖判衆咸厭服有詔川陝諸州叅用銅鐵錢每銅錢一當鐵
錢十詠言民情輕重不一難拘其法各依旬估折納銅錢公私
便之在蜀恩威並用以敦風俗篤孝義爲本民咸畏而愛之外
艱起復改兵部郎中真宗加左諫議大夫咸平初拜給事中改
御史中丞承天節齋會丞相大僚有酒失者詠奏彈之二年同
知貢舉俄以工部侍郎知杭州屬歲饑首寬私鹽之禁民賴存
活有富民臨終子纔三歲遺書以貲產十之三與子餘七與壻
子長訟之詠謂其壻曰汝妻父智人也苟以七與子則子喪汝
手矣命以三給壻人服其明斷改知永興軍王均亂朝議以詠

前治蜀優異復命知益州就遷吏部侍郎蜀民鼓舞相慶轉運使黃觀列上治狀賜詔褒美會遣謝濤撫蜀上令傳諭詠曰得卿在彼朕無西顧之憂矣歸朝復掌三班領登聞檢院有瘍生於腦頗妨巾櫛求知小郡上多其時望命知并州祥符初入爲尚書左丞轉工禮二部尚書江南旱仍充昇宣等十州安撫使以疾代還抗論賊臣丁謂王欽若啓上侈心虛帑藏困生民以奉土木無窮之費不誅何以謝天下章三上出知陳州卒年七十贈左僕射諡忠定詠剛方以智自任常言曰廉不言貧勤不言苦忠不言已效公不言已能斯可以事君矣蘇軾論其以寬得愛以嚴得畏至今民尸祝之自號乖崖以爲乖則違衆崖不利物有乖崖集十卷弟詵虞部員外郎

楊礪初名厲字汝礪京兆鄆人曾祖守信唐宦官復恭假子官

山南西道節度使同平章事祖知禮後唐均州刺史父仁儼仕
蜀爲丹稜令蜀平補渭南主簿累遷永和令廣順中周世宗節
制澶州礪費文見之館接數日退處僧舍夢一古衣冠人令隨
之往見宮衛若非人間殿上王者乘珪南向礪升謁之前有案
置簿錄人姓名礪見已名居首因請示休咎王者曰我非汝主
來和天尊異日汝主也當問之有一人笑曰此去四十年汝功
成予名亦顯矣礪再拜寤而志之建隆中進士第一父喪絕水
漿數日以母老無仕進意鄉舊移書敦諭赴鳳州團練推官母
疾棄歸開寶九年詣闕獻書召試學士院授隴州防禦推官入
遷光祿寺丞內艱服闋轉秘書丞屯田員外郎知鄂州以善政
聞端拱初真宗在襄邸遷庫部郎充記室叅軍賜金紫受命謁
見襄王藩府儀貌卽夢中所見來和天尊也真宗尹開封擢爲

推官問礪何年及第礪唯唯後知其第一謂礪不以科名自伐
甚重之儲官建兼右諭德轉度支郎中卽位拜給事中判吏部
銓未幾召入翰林爲學士咸平初知貢舉俄拜工部侍郎樞密
副使二年卒年六十九上痛悼卽冒雨臨其喪廢朝贈兵部尚
書中使護葬爲人介直清苦文尚繁蕪無師法所撰制誥詞多
迂怪見者哂之有文集二十卷子嶠祠部郎中嶧太常博士峭
太子中舍嶠至道初與張庶凝刊校真宗儲邸書籍皆賜進士
出身直史館至祠部郎中庶凝至太常丞

張去華字信臣開封襄邑人父誼字希賈少孤好學問諸父嘗
命督耕往則閱書樹下詣父怒詬辱之誼乃潛詣洛陽龍門書
院讀書與宗人沆鑾湜結交名聞都下後唐長興中和凝掌貢
擢第調耀州團練推官致書於凝言學士職當顧問四方利害

所宜詢訪若不接賓客聾瞽耳目坐虧職業疑大奇之薦於宰相
相系維翰以爲性介直可備諫職拜左拾遺時晉室新造典禮
未完數上章請復有唐故事改右補闕充集賢修撰歷禮部員
外郎中侍御史知制誥漢乾祐初拜中書舍人時蘇逢吉楊邠
王章皆驟貴薦紳多附之誼不爲屈故其嫉誼遣使吳越坐酒
失貶均州司戶卒去華幼勵學敏於屬辭初蔭補齋郎當周世
宗平淮南去華年甫十八慨然歎曰兵戰未息民事不修非取
國持久之術因著南征賦治民論以獻召試授御史臺主簿邑
邑棄官歸杜門不出建隆初始携文遊京師大爲李昉所稱登
甲科拜秘書郎直史館以歲滿不遷上章自訴願與張洎輩並
校優劣澹以所對不應問降秩遂擢去華爲右補闕賜襲衣銀
帶鞍馬朝議薄其躁進不遷秩者十六年荆湖平命通判道州

上言桂管爲五嶺衝要若大軍先克其城以趨番禺如踐無人之境詔書嘉獎代還知磁乾二州爲益州通判遷起居舍人知鳳翔從征太原監隨駕左藏庫就爲京東轉運使歷左司員外禮部郎中太平興國七年改江南轉運王師討幽州去華督宋州饋運至拒馬河就命掌河北轉運事著大政要錄三十篇以獻上覽而嘉之詔書褒美賜綵五十匹會許王尹開封命爲判官與推官陳載並賜金紫并錢百萬諭曰卿等皆朝之端士特加選用其善佐吾子踰歲就拜左諫議大夫載殿中侍御史未幾廬州尼道安擊登聞鼓訟去華徇徐鉉請托有事故不爲理上怒貶安州司馬歲餘召還歷除將作秘書少監知督許二州去華常獻所著元元論大旨以養民務穡爲急真宗深所嘉賞命寫縑素爲十八軸列置龍圖閣之四壁卽位遷給事中知杭

州奏除錢氏賦民丁錢死而不免者咸平二年徙蘇州有疾分
司西京葺園廬於洛作中隱亭以見志景德初以工部侍郎致
仕卒年六十九爲人美姿貌善談論有蘊藉頗尚氣節在營道
遇父同門生何氏二子教其學問携之京師慰薦館殿並登仕
籍然不飭邊幅頗爲清議所貶以是不登顯用有文集十五卷
子師古師顏國子博士師錫殿中丞 師德字尚賢去華十子
最器師德以爲必繼吾志嘗欲任以官辭不就知河南薛映薦
其學行因獻汾陰大禮頌於行在遂登甲科第一除將作監丞
通判耀州入爲著作郎集賢校理判理欠憑由司建言凡逋負
官物被繫本非侵盜若憚獨貧病無以自償請賜獨除詔從之
嘗因奏事帝訪以時政條對甚備喜曰朕藩邸知卿父名今又
知卿才自後每遣使輒曰張師德可用契丹高麗使來多命主

之天禧初安撫淮南嘗苦風眩改判司農寺擢右正言知制誥
在西掖凡九年不爲王旦所喜故不得遷歷刑部員外吏部郎
中判刑部并大理寺爲羣牧使景靈宮判官出知潁汝鄆三州
終右諫議大夫生平孝謹有家法不交權貴有文集十卷 孫
景憲字正國以廕任淮南運副案山陽令鄭昉奸賊巨萬流之
嶺外貪吏望風引去徙京西東運使鄆州王逵持吏短長景憲
按其罪編置宿州熙寧初爲戶部副使韓絳築撫寧羅兀兩城
命景憲往視言不可守未幾果陷還言生羌多詐邊郡名與金
帛官爵恐緩急或反內應宜亟止之又言交子可行於蜀若施
之陝西民將無以爲命後卒不行加集賢殿修撰河東都轉運
使議者欲分河東爲兩路景憲謂本道地肥磽相雜州縣貧富
亦異正宜有無相通分之不便議遂寢改知瀛州言比歲不登

民積逋欠。今方小稔。督使併償。其禍乃甚。於凶歲。願賜寬假。從之。元豐初。知河陽。時討西南蠻。景憲言。小醜跳梁。殆邊吏擾之。且其巢穴險阻。若勤兵遠征。我師坐困。帝是其言。徙同州。加大中大夫。致仕。卒。年七十七。居官不畏強禦。非公事。不及執政之門。於人少許可。在仁宗朝。吏治尚寬。景憲獨多舉劾。及熙寧以來。吏治峻急。乃濟之以寬。至新法行。不効一人。母卒。一夕鬚髮盡白。世以此稱之。

樂黃目。字元禮。撫州宜黃人。世仕江左。父史。字子正。齊王景遠鎮臨川。召掌牋奏。授秘書郎。入朝。爲平原簿。賜及第。任武成軍掌書記。擢著作佐郎。知陵州。獻金明池賦。召爲三館編修。雍熙三年。獻所著貢舉事二十卷。登科記三十卷。題解二十卷。唐登科文選五十卷。孝弟錄二十卷。續卓異記三卷。太宗嘉其勤遷。

著作郎直史館轉太常博士歷知舒黃二州水部都官職方三員外郎淳化四年巡撫兩浙獻廣孝傳五十卷總仙記百四十一卷咸平初復獻廣孝新書五十卷上清文苑四十卷與其子同在文館人以爲榮出知商州前後臨民頗以賄聞俄判留司御史臺因卜居之有亭榭竹樹之勝車駕幸洛召對賜金紫卒年七十八平生雅好著述博而寡要以五帝三王皆云仙去論者嗤其詭誕又有太平寰宇記二百卷又總記坐知天下記商顏雜錄廣卓異記諸仙傳宋齊丘文傳杏園集李白別集神仙宮殿窟宅記掌上華夸圖及自著仙洞集凡數百卷黃目登淳化進士補伊闕尉遷大理丞知壽安咸平中徙知壁州召拜殿中丞久之直史館知浚儀縣上言從政之原州縣爲急親民之任宰牧居先今朝官有數任除知州簿尉以兩任入縣令雖功

過易見而能否難明。請準唐開元故事。自今審官院差知州。銓曹注縣令。俟各及二三十人。一次引見於御前。試時務策一道。察言觀行。取其才識明於吏治。達於教化者。充選。其有不分曲直。罔辨是非者。或黜之釐務。或退守舊資。如此則官得其人。事無不治。上頗嘉其好古。遷度支鹽鐵判官。太常博士。西京轉運使。丁內外艱。皆輟奪祥符中。使契丹。還歷工部員外。起居郎。廣西陝右兩路轉運使。賜金紫。知永興。陳堯咨縱恣不法。詔黃目察之。得實。堯咨坐罷。天禧初入判三司勾院。馬元方奏黃目不舉職。詔分三司勾院掌以三人。改兵部員外郎。知制誥。屬辭淹緩。朝議以爲不稱。遷右諫議大夫。權知開封。仁宗升儲。拜給事中。兼左庶子。以註誤降左諫議大夫。知荆南。徙潭州。代還。知審官院。通進銀臺司。以風疾知亳州。卒。年五十六。錄其子理國衛。

尉寺丞定國大理評事黃目性簡默爲吏處劇亦無敗事有集五十卷又撰學海搜奇錄四十卷聖朝郡國志二十卷父子所著書卷目繁夥並見藝文志兄黃裳弟黃庭從孫滋並進士及第官至太常博士

柴成務字寶臣曹州濟陰人父自牧進士能詩官至兵部員外郎成務乾德中京府拔解太宗知其名擢甲科調峽州軍事曹單觀察皆爲推官遷大理太常二丞充陝西運副賜緋再遷殿中侍御史歷知果蘇二州兩浙轉運使入除戶部員外郎中直史館賜金紫至光祿少卿俄奉使高麗遠俗尚拘忌以日月未利拜恩稽留朝使成務貽書往返以大體開論國人信服事具高麗傳淳化二年改京東轉運使會宋州河決上言河水所經地肥澁願免民租稅督勸樹藝從之召拜司封郎中知制誥與

魏庠同知京朝官考課四年又同爲給事中蜀寇平以爲峽路
安撫使改左諫議大夫知河中時銀夏未寧蒲津當餽輓之衝
事皆辦集府城街陌狹隘奏撤民廬廣之後祀汾陰果留蹕河
中衢道寬敞咸以爲便遷給事中知梓州代還同修太宗實錄
書成知揚州入判刑部卒年七十一生平有詞學博聞稽古善
談論好諧笑士人重其文雅然爲郡乏廉稱時論惜之有集二
十卷子貽範授奉禮郎至國子博士

夏侯嶠字峻極先幽州人高祖秀爲濟州鉅野鎮遊奕使因家
焉父浦梁開平中以明經至棣州錄事叅軍嶠幼好學弱冠以
詞賦稱周相李穀延至門下又依留守向拱攝伊陽令拱移安
州攝錄事叅軍太平興國初登甲科除大理評事通判興州遷
右贊善大夫從征太原督芻糧於河朔轉殿中丞通判邠州歲

滿拜監察御史通判興元府進殿中丞雍熙二年代還太宗知其材行改左補闕直史館賜緋魚會王師護邊乘傳督河閒餽道就命知莫州徙洪州改起居郎真宗在襄邸召爲翊善直昭文館賜金紫尹京加司封員外郎兼推官東宮建復兼中書舍人爲工部郎中及卽位尤愛重之拜給事中知審刑院擢樞密副使咸平初始置翰林侍讀學士與楊徽之呂文仲並命賜宴內閣且褒以詩尋兼秘書監江浙饑爲江南巡撫使所過疏理刑訟存問耆老務從寬簡人以爲便使還上所採病民二十餘事亟詔釐革又判吏部選事景德元年五月以選人俟對崇政殿暴中風眩亟詔取金丹上尊酒餌之其夕卒年七十二贈兵部尚書賙賜外增白金給葬錄于大理丞晟爲太子中舍孫崇爲奉禮郎亦至中舍姪孫蔚同學究出身嶠善鼓琴好讀莊老

書淳厚謹慎居官無過失在近侍恩遇甚渥上多所詢訪每以善人目之後數月畢士安爲相撫坐歎曰使夏侯君在吾豈先據此位耶有集十五卷祥符初晨上漢武封禪圖繪金匱玉璽石甃石距之狀咸有注釋上覽而喜之至駕部員外郎

宋湜字持正長安人曾祖擇唐牟平令祖贊萬年令父溫故晉天福進士至左補闕叔溫舒亦進士至職方員外郎兄弟皆有時名湜幼警悟早孤與兄泌勵志篤學事母以孝聞溫舒典耀州湜侍行代作牋奏詞敏而麗因拊其背曰汝真國器恨吾兄不及見也登進士釋褐將作監丞通判梓州權鹽院就遷右贊善大夫宋準薦其文拜著作郎直史館賜緋雍熙三年以右補闕知制誥賜白金并錢加戶部員外郎同知貢舉俄判刑部賜金紫淳化二年坐妖尼道安訟降均州團練副使母老湜留其

室奉養移汝州召復禮部員外直昭文館五年改職方員外判
集賢院知通進銀臺司至道元年爲翰林學士知審官三班院
兼修國史判昭文館事爲兵部郎中眞宗拜中書舍人咸平元
年轉給事中樞密副使車駕次大名滉介冑以從與王顯分押
後陣駐蹕數日方奏事疾作仆地帝臨視賜衾褥遣內侍護送
先歸至澶州卒年五十一贈吏部侍郎錄子綸爲太祝純奉禮
郎弟湛大理寺丞姪孫選同學究出身上再幸河朔追悼之加
贈刑部尚書諡忠定滉風貌秀整有醞藉器識冲遠好學美文
詞善談論飲譔曉音律妙於奕碁筆法適媚書帖出人多傳倣
喜引重後進有名者又好趨人之急當世士流翕然宗仰之有
文集二十卷泌先登進士至起居郎直史府越王府記室叅軍
溫舒三子沆剛率喜談兵與滉同登進士歷左正言京西轉運

使解有清節不仕與种放魏野遊潯亦進士歷殿中丞知襄城以政績聞賜緋魚累遷監察御史知虢州純及泌子緯皆至殿中丞

趙安仁字樂道洛陽人曾祖武唐虢州刺史父孚字大信周顯德進士宋乾祐中爲永寧令部糧饋太原民懷其惠擢宗正丞開寶中初置衣庫令孚主之坐事連逮語見趙普傳太宗起爲國子監丞知袁州還除開封司錄叅軍行視黃河言復遙隄不如分水勢建議於澶滑二州立分水之制不果行會議封禪孚因上封禪頌召拜秘書丞賜緋魚鞬開封獄得情授推官遷監察御史改殿中侍御史雍熙中詔詢文武禦戎之策孚奏古者兵交使在其間雖飛矢在上走驛在下蓋信義不可廢也如并州一方歷代難取聖祿英斷一舉成功當其逆時城危累卵而

臣下猶遣通事舍人薛文寶入城諭之曰者北邊未賓全燕猶
梗欲望朝廷通達國信諭以禍福示以恩威議定疆圉永息征
戰養民事天濟時利物莫過於此上嘉之時安仁已通顯廷策
貢士爲考官賜金紫上以字名士亦同賜之明年卒年六十三
安仁生而穎悟幼時執筆能作大字十三通經傳大旨早擅文
藝趙普沈倫李昉石熙載咸推獎之登雍熙進士歷大理評事
光祿寺丞以善楷隸奏令書監本五經正義王侯內戚多以銘
誄爲托召試翰林除著作佐郎直集賢院賜緋獻九絃琴五絃
阮賦文辭雅澹詔書獎諭遷太常丞真宗拜右正言預重修太
祖實錄出師大名安仁疏言急務者三激勵戎臣舉勸懲之典
賑救邊民行優恤之惠車駕還京重神武之威大要者五選將
畧持兵勢運機謀修軍政愛民力咸平三年同知貢舉以工部

員外郎知制誥副夏侯嶠巡撫江南還知審刑院有將校坐筭所部卒死論抵安仁言軍令非嚴不整遂獲免繼判刑部兼制置羣牧同知三班審官院景德初梁顥稱其文行拜翰林學士從幸澶州以能記太祖時聘問書式會契丹請盟遂命答書兼裁定接伴覲見儀制遣使韓杞語誇誕安仁面折之杞既受虜衣之賜猶服左袵安仁言君將升殿受還書天顏咫尺何以拜命乃改服而入及姚柬之至又令接伴談次頗矜戰功安仁隨機辯折柬之不復敢言又屢稱王繼忠之材安仁曰繼忠兵敗不能死他何足數上聞其酬對切中事機益器重之有柄用意又集和好以來事宜及采古事作戴斗懷柔錄三卷以獻二年同知貢舉三年拜右諫議大夫叅知政事兼修國史祥符初爲封禪經度制置使判兗州禮成拜工部尚書內外書詔切要者

必經其裁進轉兵刑二部同知禮儀院凡三典貢擇士平允畧
無譏議上再賜詩嘉之尋兼宗正寺卿自梁周翰後制尚未備
安仁重加詳定爲仙源積慶圖統例精簡又奏置修玉牒官舊
制宮闈令凡有議奏與寺連署上因其舊德俾以次列狀取裁
國史成遷尚書右丞景靈宮副使奏言陛下君臨之大庶政宜
分飭有司遂詔諸司掌常務有條例者不必奏稟天禧二年改
御史中丞請給御寶書三院御史彈糾事五月以暴疾卒年六
十一贈吏部尚書諡文定官其子溫瑜大理寺丞承裕正字安
仁質直純慤無所矯飾寬恕謙退與物無競雖家人僕隸未嘗
見其喜愠善訓諸子各授一經獎誘後進成其聲名女弟早寡
取歸給養訓甥董靈運爲舉婚娶性嗜書所得俸賜輒以購書
自奉簡約如未貴時所畜虞世南北堂書鈔手自讐校真宗嘉

其好古手詔褒美尤知近世故實凡典章人物之盛悉能記之
有集五十卷 子尚寬字濟之以蔭知平陽移知忠州教人服
藥捐畜蠶方書於市索爲蠶者真之法風俗大化預發官帑與
民市轉還司官鹽不擾而集嘉祐中考課第一改知唐州唐素
稱沃壤經五代亂土曠人稀不足充役議者欲廢爲邑尚寬至
則按視圖記得召信臣陂渠故迹發卒治之溉田萬頃教民自
爲支渠轉相浸灌來者雲布計口授以荒田貸官錢買耕牛勤
於農政比三年榛莽復爲膏腴增戶萬餘治有異效民肖像以
祠三司使包拯上其事仁宗下詔褒美增秩賜金英宗再進二
官賜錢十萬王安石蘇軾作新田新渠詩以美之徙知同宿二
州轉河中府神勇卒苦大校貪虐匿名告變尚寬先命焚之後
乃奏黜大校分卒他營衆心以安凡去唐數歲田日加闢戶日

益衆朝廷推其功自少府監遷直龍圖閣知梓州積官至司農卿卒良規字元甫以父奏爲秘書正字同判太常寺張知白薦之名試賜及第王曙復舉擢集賢校理兼宗正丞預修會要坐吏盜太廟神御物出通判蘄州徙河南知秦滁二州歷京西陝西提點刑獄荆湖南路轉運奏罷馬氏時丁口賦米權判三司開拆司度支勾院直集賢院知廬州入爲光祿卿直秘閣同判宗正事遷秘書監知同陝相三州陝歲饑請開百姓殘稅二分爲官伐芟以給河埽從之進太子賓客權殿中省遷工部侍郎判本部尋知濠州卒所至爲政不甚力善委僚佐祿賜多分贍族人孫君錫字無愧性至孝母亡事父良規不違左右夜寢於旁凡衾褥厚薄衣服寒溫藥石精粗飲食旨否櫛髮剪爪整冠結帶如內則所載無不親之登進士以親故不願仕父每

出必扶掖上下至雜立僕御中嘗從謁文彥博異其容止問而知之彥博語諸子令視以爲法父沒調知武強從韓琦大名幕府吳充薦爲檢詳吏房文字徙太宗正丞加秘閣校理時增諸宗院講書教授官令逐院自備月餽貧者不能以時致君錫上言凡州縣太學養士尚不較費安有教育宗室自行束脩之理始悉從官給餼爲開封府推官元祐初歷司勳右司郎中太常少卿擢給事中會蘇軾出知杭州君錫言蘇軾之文追攀六經蹈藉班馬知無不言王人畏憚公論倚重隱如長城請留之在朝用其善言則天下蒙福聽其讜論則聖心開益行其詔令則四方風動爲利溥矣進刑部侍郎樞密都承旨拜御史中丞勸哲宗親講學廣諮問爲躬政之漸復以吏部侍郎天章閣待制知鄭陳澶三州河南府徙應天紹興中貶少府少監分司南京

卒年七十二。紹興六年。贈徽猷閣直學士。

查道字湛然。休寧人。祖文徽。仕南唐。至工部尚書。父元方。建州觀察判官。歸朝。拜殿中侍御史。知泉州。卒。道幼。沉疑不羣。罕言笑。未冠。以詞業稱。奉母盡孝。方冬。苦寒。母病。思鰕羹。泣禱於河。鑿冰得鰕。尺許。以饋。病亟。卦臂血。寫佛經。母尋愈。端拱初中。高第解褐。館陶尉曹彬辟爲從事。甚被禮遇。改興元觀察。推官寇準薦其才。授著作佐郎。淳化中。蜀寇叛。命通判遂州。道性純厚。深廉部使者。上其狀。遷秘書丞。徙知果州。寇黨何彥忠擁衆屯山。充之大木槽。詔書招之。未下。道單馬趨賊壘。諭以詔意。有識之者曰。此仁郡守也。寧害我乎。相率投戈羅拜。賜其酋冠帶。餘悉給券歸農。驛聞。聖書褒諭。咸平四年。代歸。賜緋魚。上言。朝廷命轉運使。副不但綜核錢穀。兼以廉察郡縣。今所至或不盡職。

良由未設懲勸之科致成因循之弊自今每使回日令具任內舉劾實跡議其臧否以爲賞罰詔從之出知寧州舉賢良方正策入等拜左正言直史館未幾爲西京運副六年召拜工部員外郎充度支副使賜金紫以治劇非其所長罷知襄州祥符元年歸直史館再轉刑兵二部員外郎預修冊府元龜歷龍圖閣待制刑部右司郎中判吏部選事糾察在京刑獄使契丹還以耳聾表求外任知虢州會蝗災出廩賑救給麥種民賴以濟所至務寬恕胥吏有過未嘗笞罰民逋或出已錢償之嘗出按部從者摘路旁粟以獻道計直掛錢於樹而去兒時常畫地爲大第曰此當分贍孤遺及貴官舍多聚親族祿賜散施隨盡不以屑意與人交情誼篤至初赴舉時親族哀贈以錢過滑臺遇父友呂翁之喪將鬻女以葬道傾錢與之爲其女擇壻別加資遣

有故人卒質女爲婢道贖還之籍紳服其履行好學嗜奕澗信
內典平居茹蔬或止一食默坐終日服玩卑儉嘗夢神人語以
位至正郎壽至五十七後享年六十四蓋積善所延云子循之
官大理評事有集二十卷從兄陶字大均登南唐明法科補
常州錄事叅軍歸朝詔試律學除大理寺丞遷寺正歷侍御史
判大理寺賜緋遷工兵二部郎中知台州咸平中遷秘書少監
屢攻知審刑楊億過失命代之賜金紫卒年七十爲人持法深
刻用刑多失入子拱之淳化三年進士後爲都官郎中慶之太
子中舍

任中正字慶之濟陰人右拾遺載子第進士爲池州推官歷大
理評事大府寺丞通判邵興濮州錢若水薦遷著作佐郎通判
大名運使陳緯舉以自代召爲秘書丞江南運副太宗見其軀

幹頤長擇大笏長緋衣賜之至部值歲大稔租賦平糶皆盈羨
發運使王子與欲悉調餉京師中正不肯曰異日或歲稍歉則
數不登患及吾民矣擢監察御史兩浙轉運使民饑不俟詔發
廩以賑按晉州盛梁獄論如法遷殿中侍御史判三司惡由司
既而有與梁善者密中之出爲荆湖轉運使遷左司諫直史館
知梓州尋遷樞密直學士知益州在郡五載悉遵張詠條教蜀
人便之進知審刑院知并州遷給事中尹開封祥符九年拜工
部侍郎樞密副使改兵部侍郎叅知政事仁宗在東宮以右丞
兼太子賓客遷工部尚書卽位改兵部尚書與丁謂善謂因山
陵得罪中正言其嘗被顧命當從八議王曾駁之以爲不忠不
孝尚何所議謫知鄆州以母老徙曹州入爲禮部尚書卒贈右
僕射諡康懿平生事親孝居常簡素而膳羞極豐美母與諸命

婦同人謁禁中真宗命母爲班首賜坐弟中師字祖聖及第
試校書郎陳堯叟辟掌河中牋奏遷著作佐郎歷知平陸千乘
襄邑改秘書丞張知白薦爲右正言因中正謫亦貶太常博士
監宿州酒稅未幾通判應天府曹利用辟爲羣牧判官徙知滑
州入爲開封判官累遷度支郎中直史館知澶州遷太常少卿
直昭文館知廣州兼市舶使還爲諫議大夫集賢院學士判刑
部以龍圖閣直學士知并州許便宜從事改樞密直學士知益
州先運使韓續急於籠利算至薪芻蔬果之屬中師咸奏蠲之
康定中呂夷簡薦其才不在任布下遂與布並召爲樞密副使
明年建北京令領修建進給事中求補郡以禮部侍郎資政殿
學士知永興內徙復知陳州以家在曹求改曹州加戶部侍郎
請老拜太子少傅致仕進少師卒贈太子太傅諡安惠爲人性

樂易平居自奉儉約晚知養生之術號大塊翁

朱台符字拱正睂山人父賦舉拔萃科歷度支判官終殿中丞
台符少聰穎十歲能屬辭嘗作黃山樓記士友稱之及長善詞
賦尺牘而成太宗親試貢士多擢敏速者遂登第解褐將作監
丞通判青州入直史館賜緋魚再遷秘書丞知浚儀縣咸平初
同知貢舉擢太常博士出爲京西運副上言北邊爲梗自古所
有歷代經營未爲無策我太祖酌取中道與民休息遣使往來
二十年間大省戍邊之卒不興出塞之兵關防寧謐府庫充溢
深得制禦之道太宗平晉之後因其兵勢將遂取之人雖協謀
天未厭亂自茲以來大肆兇鋒旣阻歡盟復爲備禦屯士馬益
將帥輓芻粟委金帛給賞賜不可勝數陛下自天受命與物更
始繼遷受節黎桓加爵咸命使者鎮撫其邦惟於契丹未加渥

澤非所以柔遠能邇。昭王道之無偏也。今祥禪將終。中外引頸觀聽德音。宜於此時赦既往之罪。修鄰國之好。擇文武才畧。辯說之士。往告諭之。彼必歡悅。慕義遣使。朝貢因興。復尋舊盟。利以貨財。許以關市。如太祖故事。使之懷恩畏威。則兩國和好。無北顧之憂。可以專力西鄙。是一舉而兩得也。時論韙之。二年旱。應詔上言。陛下踐祚以來。彗星一見。時雨再愆。彗星者。兵之象也。時雨愆者。澤未流也。宜重農積粟。簡卒省費。專將帥之任。慎守令之選。節無名之賞。賜罷不急之造。作考課黜陟。輕徭均賦。教化有未行者行之。廉耻有未立者立之。責任大臣。不使法有滋章之條。吏無惻隱之實。奏入。召爲鹽鐵判官。改判戶部勾院。拜工部員外郎。換度支判官。景德初。代鄭文寶爲陝西運副。仍賜金紫。台符俊爽。好謀然頗事更革。煩擾以苛碎爲舉。職運使。

楊覃欲因仍舊貫事多違戾徙知郢州三年召還執政有不喜者復出知洪州卒於舟次年四十二上甚悼惜之賜其子公佐同學究出身卒又以次子壽隆試將作監主簿平生有文學及著述可稱喜延譽後進有集三十卷弟昌符亦進士爲屯田員外郎

謝絳字希汲其先陽夏人祖懿文爲鹽官令葬富春遂家焉父濤進士以文行稱爲梓州判官李順反嘗盡守禦之計賊平以功遷觀察推官權知華陽時亂亡之後腴田悉爲豪右所占流民至無所歸濤悉推還主改著作佐郎知興國軍以治行召對長春殿舉所部官三十餘人宰相嫌其多濤曰有罪願連坐舉主連坐自此始改知曹州時莽丹聲言趨齊鄆而曹濮復多盜屬縣賦稅多輸睢陽百姓苦於轉送濤奏乞留江淮漕運過睢

陽者取以餉軍留本州賦粟由廣濟河以饋京師從之馮拯薦
試兵部員外郎直史館兼知雜御史真宗崩上言遺詔從儉而
有司治靈車象物侈大所經道路輒壞城門毀廬舍以過非先
帝意因悉下少府裁損俄進直昭文館終太子賓客絳初以廕
試校書郎登第知汝陰縣善議論喜談時事楊億薦其文召試
擢秘閣校理同判太常禮院母憂服除遷太常博士尋通判常
州天聖中疏言去年京師大水敗民廬舍滑州河暴溢幾冒城
郭今年苦旱百姓疫死田穀焦槁秋成絕望此皆大異夫風雨
寒暑天之信也信不及於物澤不究於下則水旱爲沴近日
制命有信宿輒改適行遄止而欲風雨以信其可得乎以天下
之廣萬幾之衆豈能盡知而在廷之臣未聞被數刻之名吐片
言之善朝夕左右非恩澤卽佞倖上下皆蔽其應不虛是以兩

漢策免三公。以示戒懼。今陛下進用丞弼。極一時之選。而政道未茂。天時未順。蓋由大臣輔佐不明。陛下信任不篤。宜推心責成。以極其效。或更選賢者。無使奸邪易進。守道數窮。若循依違之迹。行尋常之政。臣恐不足以回靈意。塞至戒。又言古者穀不登則虧膳。災屢至則降服。願下詔引咎。損太官之膳。避路寢之軒。許士大夫斥忌諱。切時病。罷不急之役。省無名之餼。勿崇私恩。更進直道。至誠動乎上。大悲浹於下。豈復有時澤之艱哉。仁宗嘉納之。擢爲國史編修。遷祠部員外郎。直集賢院。父老乞便養。通判河南絳。雖已居外。猶數論事。言唐室麗正史官之局。並在大明華清宮內。太宗肇修三館。更立秘閣於昇龍門左。親爲飛白書額作贊。刻石閣下。景德中。圖書浸廣。真宗益以內帑四庫二聖數臨幸。親加勞問。通宿館內者。不時召見。故人人力道。

術究藝文。知天子尊禮甚勤。而名臣高位。由此其選也。往者延
椿。未遑中葺。或引兩省故事。別建外館。直舍卑隘。供擬滋削。陛
下未嘗迂翠華。降玉趾。意者慕道不篤。待士少損。士亦因循相
尚。不自激發。文雅漸弊。竊爲聖朝惜之。願闢內館。以恢景德之
制。詔報可。絳又論近歲不逞之徒。託言數術。以處士自名。禿巾
短褐。內結權倖。外走州邑。甚者矯誣詔書。傲忽官吏。請嚴禁止。
追還墨勅。罷賜封號。俄權開封判官言蝗亘田野。空入郭郭跳。
擲官寺井堰皆滿。魯三書蟻殺梁。以爲哀公用田賦虐取於民。
今朝廷歛法。近於廉平。以臣所聞。似吏不稱。而名其變。凡今典
城牧民。顓方面之任。才者掠功取名。以嚴急爲術。愚者期會簿
書。畏首與尾。二者政殊。同歸於弊。夫爲國在養民。養民在擇吏。
吏善則民安。氣和則災息。願詔公卿以下。舉任大州邑數十百。

人使得自辟屬縣令長務求術畧不限資考然後寬以約束許
便宜從事期年條上理狀或徙或留必有功化風迹異乎以資
而任之者漢時詔問京房息災之術房對以考功課吏臣之所
願陛下者以此會郭后廢絳陳述白華之詩以諷辭甚切至徙
三司度支判官兵部員外郎言邇來用物滋侈賜予過制比詔
裁節費用有司移文但求咸平景德簿書臣以謂不若推近及
遠通考歲用而裁節之不必以咸平景德爲準初詔禁人服川
自掖庭始罷織密花透背旣而復取於有司又後苑製玳瑁器
索龜筒於市絳皆論罷之又進聖治箴五篇言號令數變則虧
國體利害偏聽則惑聰明請者務欲各行而守者患於不一請
罷內降凡詔令皆由中書樞密然後施行父憂服除擢知制誥
判流內銓吏部擬官舊視職田有無不問多寡以是不均絳爲

覈其實以多寡爲差其有名而無實者皆不用人以爲便改判太常禮院知禮儀事使契丹還調知鄧州距州百二十里有美陽堰水來遠而少利絳按召信臣六門堰故迹距城三里墾木注鉗膚陂溉田至三萬頃請復修以與民未就而卒年四十六絳以文學知名一時爲人修潔醞藉所至大興學舍嘗請諸郡立學在河南修國子學教諸生自遠而至者數百人姪施宗族喜賓客卒之日家無餘貲有文集五十卷子景初景溫景平景回景平好學著讀書傳說數十篇終秘書丞景溫見後